

松潘縣志卷八

文苑

岷山賦

溫江徐荆船

浮雲萬疊佳木千春聖賢里域仙佛緣因仰維勝蹟古記二岷岷
夾崇山低界突起體象月弦勢如石几青龍東環白虎西峙後倚
金剛前橫塔子四固蒼巒一灣白水爾其遠接臨洮近宗羊膊連
隋高撐郎多上廓骨石盤雲紅崖產藥羊角扶搖馬鞍踴躍穀粟
送迎胡蘆聯絡屯結火燒氣鍾龍涸若夫岡出分隴弓楨連甘嶺
能走馬陵不浴蠶赤翹火燄白擁雪蓮金蓬附屬玉壘中參七盤
倚北九頂橫南錦屏日落石鏡烟含至於西天右臂毛耳外羅秀

松潘縣志

卷八 文苑

一

連筆架高挹峩和紅花遍嶺白土盈坡馬頭雄立熊耳斜拖青城
列障赤岸成阿野狐有峽飛鳳無窠黎峽迤邐蒙蔡嵯峩一坊金
馬七頃烟螺其餘娘子浴頭巨人竦骨須彌聖燈龍泉神窟蛇浴
開途雁門列闕劍閣千仞巴山萬笏巫峽朝雲峩眉秋月系在餘
支零如毫髮回憶崑崙峯脈溢樂發踪二千差里卅六作峰女几
基枕衡陽當衝夔厓內鎖敷淺率從勢陵華夏氣肅春冬瑞鍾白
鹿靈集黃龍所異聖哲間生賢豪輩出神禹施功道陵鍊術蹟記
赤松眞尋太壹楊雄草亭蘇軾書室白玉多才青蓮有筆君平垂
簾老子委質維岷之精占井之吉下俯蓉城滄海浴日

江源賦

徐荆船

伊大江之奔逝兮赴巨海而不回翻浪花而馳電兮掀石礮而震雷始湍激以廣納兮繼澎湃以相摧乍信其地中湧兮又疑爲天上飛來試爲溯其源窮其腹並駕黃河亦稱巨瀆女几山之陽斜爾坤之麓鐵豹嶺之輿羊膊石之谷出泉則眾澗皆趨分水則一手可掬如星布於敖敦如瓴建於高屋如天外之翻瓢如雲中之飛瀑如羣龍之奔臨如萬馬之追逐如車轍之就途如機絲之在軸絡井度參會昌建福其始濫觴近北極卅三度其繼順軌計流域五千籌浪架嶺爲蓄勢喇哈納爲上游天彭甘松經其道牟尼羊角納其湫或合以東勝水或注以雲昌溝或歸化北定三水均集或長寧小姓黑翼并投或魏門關而左右受或茂縣界而東西

收或經草坡而龍潭天赦沙派往滙或逾娘子而納凹慈姥白沙同流乃遂析於二千年之離堆灌口而普漑夫十四縣之天府平疇他如左翼惟沱湔之殊右翼有雅瀘之異嘉陵張其北流瀾滄爲其南臂涪渠皆屬細支黔彭有如列侍襄漢會於鄂中湘沅帶於楚地漸大彙夫潯淞更遠容夫淮泗湖澤視若贅旒徐揚特其別幟終出崇明之辰方遙應松州之戍位竊憶神禹敷土后稷効庸先謀水利卒無病農始原潘噶繼及漳松雪資流液泉列朝宗嶺不尋乎白馬舟乃負以黃龍鼈靈蒙其餘利李冰繼其芳踪郭景純第爲揚摧酈道元詳爲折衝莫不遠仰玉壘而土尋雪峯彼有徒以水流長短遂定江源趨附不明禹貢經文又昧水經疏注

以鴉礮江由外徼認打冲河爲正路乃妄尊夫金沙且雜混夫大
渡元可汗已失鉤稽清仁皇更滋謬誤徐宏祖雖襲其說張邦仲
特明其故非只地脈之遠差亦忘人民之急務是以粗按之新圖
而詳爲之擬賦

籌松賦 并序

徐荆船

子雲太冲賦蜀都物類備矣而不及時務心向慕之久欲擴
充茲撫松邑形勝不惜才薄聊步後塵以供當事之鑒焉

維西蜀之創域始人皇之闢疆經宿上聯參井世居半集氏羌松
州勢丁要隘禹貢服列綏荒守衛近資龍茂交通遠接秦涼人民
習安土著兵勇夙稱剛強欲梟桀之悉化須控馭之有方觀夫岷
嶺西環雪山東峙面逼金蓬下憑玉壘據漳臘則壓伏百蠻出黃

松潘縣志

卷八 文苑

三

勝則游牧千里蘭花則香遍崖間火焰則峯出雲裏骨石弓楨爲
險途黃龍朝陽皆仙址雖深入乎夷巢實式臨乎江水至於大江
肇源羊膊支流并納小河上劃二嶺之分水左盪九道之白波涪
漲乃近連建始安戎亦外接蓬婆龍潭交映夫秋月馬蹄隱溷夫
苔窠玻璃之温涼可愛珍珠之濺沸非訛文武試李安之劍濶流
迴黨項之戈其爲產也園蔬以芹韭蒜葱農業以芋蕎菽麥養生
有芝菌胡麻採料惟蒼松翠柏金銀藏山雄硫盤石藥重參耆食
資酥液鬪藥盈千摘花累百青稞爲晉穫之糧紅稻僅數倉之積
其爲貨也販載牛乳羊乳服用獼皮狐皮土狗野貂非異鹿茸麝
麝爲奇家畜追風之馬牧牽卧雪之犛美飾以毛毡繡毯佐食以

野雉山麋蟲草乃老人之寶雪蓮原孕婦所宜獵獸俟九秋之令
行商須六月之時惟是地處邊陲人嚴武備漢族習文駝夷肆志
籌邊勞宰相之謀樹戟崇將軍之位唐宋猶重視羈縻明清乃大
爲創治西土番帖耳甘奴大小姓洗心就義一百零寨均範以土
司五萬餘人始安於樂地若夫飛空走曠水族昆蟲僉名異物亦
稟化工爾雅雖詳品類山經莫辨雌雄牲畜只供宰割鷹鵠無取
樊籠猶徵風俗醇厚內外和同無機智之相尙無奢靡之是從方
今天下爲家共和建國人道是尊憲綱立則更宜修道途勸墾殖
廣畜牧修文德工業以納遊民鎗丸以重武力習統一之語言通
五族之貨食要使歸化者編戶輸租有能者奉公盡職夫何有防
備之足云而經營之維亟

松潘縣志

卷八 文苑

四

雪山

宋進士范成大

大面峯頭六月寒神鐙收罷曉雲斑浮空忽湧三銀闕云是西天
雪嶺山

雪山

明薛 曾

雪嶺高寒井絡邊千年積雪尙依然層樓直接三城戍懸磴西連
萬里天琪樹籠晴光奪目銀潢垂練午生烟玉京咫尺瓊樓在應
有飈車載列仙

雪山歌

明楊 慎

君不見雪山玉立天西頭使君新起迎仙樓粉霞堊翠天尺五恍

如方壺與瀛洲又不見樓中仙人雪山子質抱瓊黃服金紫夕服
沆瀣吞淪陰朝茹靈芝和石髓楚國湘纍蜀謫仙光燄日月懸千
年沈醉大雅憐湘素枕籍離騷拾蕙荃因思謝眺吟紅藥玉湖亦
動蘭池作瀾翻筆底湧波濤磊落胸中著邱壑瑟瑟秋風迎初商
碧霄如拭鮮飈涼塞垣鴻雁來千里河漢文章仰七襄天籟爲歌
露爲酒弄玉傳杯飛瓊走還賡白雪郢中篇遙指羣仙爲君壽

雪山天下高詩

明長甯周洪謨

巨靈擘斷崑崙山移來坤維參井間內作金城障三蜀外列碣磳
居百蠻自昔蠶叢始開國千巖萬谷積寒雪疑有五城十二樓玉
色玲瓏界天白光聯銀漢霏素虹六月大暑飄寒風俯見五嶽在
平地遙窺三島皆冥濛此去石紐無幾許昔鍾靈秀生大禹當時
自此導江流至今名垂千萬古

雪山

明宋廷立

誰將和氏玉妝點蜀山尖野戍三城白邊庭六月寒天開雲母障
日照水晶簾挂笏看收處公餘興未厭
有峯誇九頂無雪不千秋便覺通霄漢還將傍斗牛泉飛雲忽起
彩散日初浮最喜當牕近時時得坐遊

雪山

明方象瑛

未是峩眉境何來入座看蠻中晴亦雪徼外暑偏寒雲散千峯白
霜凝萬壑丹鱗鱗望不斷指點是松潘

題包子寺

明萬 萼

綠樹重陰覆碧峩斜陽嘶馬下層坡喇嘛僧靜風聲軟包子寺寒
月色皤七校枕戈無戰壘八郎司鐸有夷歌天涯盡處皆王化何
事驍騎出塞多

天柱山絕頂望見岷山詩

清王士禎

鞍馬眾峯頭蒼茫萬里收岷山橫塞外灌口接天流要害三城戍
邊防八月秋大荒飛鳥外眼底盡洮州

岷江

清劉紹攸

江聲如萬鼓日日詫驚雷急浪迎風立盤渦觸岸回頓令裘葛異
頻覺燠寒催夷漢居相雜安邊仗俊才

松潘縣志

卷八 文苑

六

松州卽事

清王夢庚

六月飛霜五月裘墨雲黑浪古松州不辭走馬來天外爲要看山
到盡頭雪擁蓬婆城外壘雲開滴薄戍閒樓中山遺像還留在爲
酌香醪薦素秋

明徐中山王後有龔松潘指揮者遺像尙存

松州卽景

徐競存

遠稽岷水到玻璃百道泉流合眾支地僻已當天缺處秋寒又屆
雪飛時嶺循白馬猶徵信寺奉黃龍尙闕疑逝者如斯川上望禹
功誰爲刻殘碑

莊嚴民國建神州豔說人權與自由試設商場精織造廣興學校
化薪樵殖民莫與分羣黨開鑛先須釋怨仇四海一家同進化好

將東亞勝西歐

松州行

徐競存

憶昔少時披圖記亞洲西有帕米爾踞高俯視小八極至今俄人
竟雄起中華自古肇蜀山蜀之要隘惟松潘上通甘涼下成都萬
貨羣集饒商廛審緬地勢上出雲天西踞岷嶺東望雪山北守黃
勝南戍平番四塞築城十里設關山高水險無慮籌邊胡爲在昔
庚申辛亥歲夷人突然起烽烟覬由守軍被調遣全城一炬真堪
憐對河金蓬爲賊有人民逃生傷摧殘西門頂上亦失備官守走
死奚益焉省軍兩次幸克復凋敝猶未還本原惜不改番歸流籍
較勝西藏非孤懸噫嘻試問彼蒼生萬物豈謂羌氏非民族古曾
助周戰牧野抑何向化甘綏服迄今秦漢專制嚴竟視外人皆凶
惡竭立征剿二千年何以至今尙彊倔我今遠遊松州城時見夷
性多和平只因教育未普及文字語言各生成况爾夷人務謹信
并無權利與競爭寄語守斯土者先以兵鎮後以德化要令天下
一家無異情

頌夏琅溪

雙流王鑑洲

天遣元戎靖蜀疆金戈鐵馬寓慈祥是真名將心無忝如此奇勲
面獨當保障遠屏唐古忒生祠高建魯靈光我今幸作依劉客親
見英雄老更強

頌夏總戎歌

邛州伍肇齡

蒼山洱海西南徼金馬碧雞通蜀道江山盤鬱靈氣鍾崛起偉人
眞國寶身經百戰衛鄉邦膚如刻劃曾無撓死生一致出艱難大
似尉遲立功早丹墀詔對天語溫龍顏驚喜嘉忠抱昔年作鎮蒞
松州和輯民夷善運籌士卒懷恩同挾纊春風被澤不知秋錦城
移節尤尊重營務全川運量周前年鞠旅歷邊隘決勝遐荒征黠
酋三砦從來恃隅負途阻行旅森戈矛連營並進誅不法崩角稽
首皆誠投文報自茲無復梗西通藏衛盡庚郵維茂連疆皆忭舞
四民安樂遍歌謳我今識公二十稔知公特操非常流忠勇性成
志敵愾熊羆之士宜公侯是翁矍鑠古所詡令德壽考承天庥

贈夏琅溪

關中楊承起

松潘縣志

卷八

文苑

八

武侯已往衛公死曠代雄才誰繼美籌邊樓畔賸斜陽古柏祠前
空流水聞道南中見彩雲勛名今讓夏將軍丁年不覩妖氛起午
夜長懷待旦勤一朝歛構花門亂洱海滇池蹂躪遍兵驕師老戰
無功鶴唳風聲魂欲斷將軍威武邁天神誓掃欃槍不顧身廿七
傷痕終不死九重褒讚寵長新百戰威名垂金碧將軍馳馬入蜀
國十年松嶺宣壯猷千里岷山頓改色振武興文善政多夷人忭
舞漢人歌天命錦官開帥府留公不住奈公何西人欲繪益州像
朝日鳩材夕命匠古繩祠宇啟嵯峩遐邇軍民齊仰望吁嗟乎郇
伯黍召伯棠千秋萬世共流芳我今重入元戎幕笑嚼梅花賦

短章

松潘總兵宋公傳隨園詩文集

錢塘袁 枚

公姓宋名元俊字甸芳江南鳳縣人以武進士任四川城守營守備遷阜和營遊擊乾隆三十六年夏金川酋索諾木襲殺革布土司其黨小金川酋僧格桑亦發兵侵明正土司據斑斕山阻官兵進路被害者相繼告急總督阿爾泰知公素得夷心命抵賊巢責問原委公至刮耳崖索諾木迎謁詭以革番內變爲辭公知其詐歸告阿公曰兩酋犄角爲奸雖陽恭順而陰怙惡非一大創不可如興師當先取小金川卽獻三路進兵之策一從斑斕山直探小金門戶一從堯磧截取甲達金山梁救達圍而趨美諾一從小金川尾閭由約咱進攻遜克宗阿公以其計奏聞上命副將軍溫福提督董天弼分路進兵總督阿爾泰駐劄後路居中控制當是時

蜀敕平日久文武恬熙一旦軍興相顧喑嘆兩金川地勢奇險礮卡柴立兵將未言色沮公獨能聚米借籌歷歷指畫於是諸將軍運糧出戰一切惟公是詢公探知小金川所佔明正之達頂山梁與巴底巴旺毗連密令參將薛琮挾巴酋暗擊山頂而自統兵從甲楚河攻之賊腹背受敵大驚奔潰收復納頂碉寨百餘卽用納頂土百戶爲前導直搗約咱賊愈困聞天兵至卽走登時提督董公破甲金達副將軍溫公收復斑斕山再克卞了上嘉之擢松潘鎮總兵賞花翎時三十七年正月十日也計進剿小金川未及五月而侵地全收聖諭褒美公愈感奮將直搗賊巢旋奉將軍命調回籌辦什咱事宜受代而行方攻奪河東時小金川求救於索諾

木索諾木許之將襲我後路公得巴酋密報遣使至刮耳崖罵責之索諾木知情虛撤回原兵於要隘處增礮固守公請於制府曰大金川逆形已露不可不誅然犯險強攻徒損士卒不如即用革布逃酋其人有報仇雪恥之心尤悉地形可使也遂密遣番民乘夜踰山約諸酋連結各寨爲內應而自率遊擊吳錦江等由節木郭渡河據勺藏橋舉礮爲號革番從內突出與官兵合力夾攻斬千餘人進圍丹東角洛收復革境三百餘里事聞上愈嘉獎賜荷包寵異之先是公別遣守備陳定國潛赴綽斯甲布土司屯兵甲爾壟壩上聽候調遣人莫知其意及革境全平金酋畏綽土司之躡其後不敢傾巢出戰大兵雖在東南而制勝則在西北甲爾壟

上雖按兵不動而金革兩處已扼咽喉公算畧深沈皆諸將所莫及時上意大兵乘勝即可擒去索諾木而公言兵少未可輕進爲制府所劾調回大營隨即革職鬱鬱不得志病卒於軍年五十八公長身卓立音響如鐘髯長尺許望而知爲偉人料敵審勢毫忽不爽初收復革番所用兵不過千許及進攻金川公建議北路必需三萬人當事者疑公怯不聽所請卒無成功後副將軍明公廣集漢兵士兵三萬人先通路後進兵其言始驗公待士卒信用法嚴與參將薛琮交最厚攻小金川時制府重公命以遊擊領兵節制諸將公磨利刀與薛約曰某地某日會我後至君斬我君後至我斬君及公至所期處而薛逾二刻始來公遣飛騎持刀呼取薛

參將頭薛望見笑曰薛頭與賊不與公也奮前奪數礮反公猶手縛之請罪於制府以公論贖乃已先是馭番者平時視如草芥及蠢動又畏如虎國家所賞繒帛易以贏濫酋叩頭領謝去歸視大恚笑擲於路公有賞必佳物其人輒喜相告或舁公抵其巢率妻若女環侍左右公賜以茶烟簪珥兒子畜之小不循法立加笞呵咸悚息聽命打箭鑪邊關以外官將行李俱畏夾壩出沒惟公與果齊盛太守之箱篋蠻天爭爲背負或遺於路必擎送行幄諸番小有動靜先來告公以故凡所料判動合機宜死之日番人務面環哭聲振巖野平居以忠義自許思立功名然性剛能恤下不能事上偶有議論慷慨迅厲旁若無人以致讒忌者眾身後家籍沒

松潘縣志

卷八

文苑

十一

兩子戍邊有張芝者以走卒隸公麾下拔至參將四十一年春大將軍阿公桂平定金川凱旋時芝書公戰狀抱一冊哭陳軍門代爲奏聞邀恩赦其子歸人莫不嘆張能報德公能知人

馬節婦家傳

羅德輿

天下之不可測者其事變乎苟非發於至性雖士夫有不能堅持者矣况巾幗哉予以觀馬節婦行誼又何綽然也節婦米氏蜀之松潘人生十九年而嬪於馬隆府君條理精密家無廢事舅福祥府君姑盧孺人顧而樂之益豫以順諸娣姒次第入門節婦一率以勤儉罔踰禮則羣從子女燠之甘之潔之亦幾忘其母而母節婦焉盧孺人性慈多善舉節婦曲體親意見稱里黨而析居時內

外無間相與翕然其所以委曲求全者尤非恒情所能喻清咸豐庚申番變圍松城急松固蜀之奧區筦鑰西陲華夷互市者麇集總兵駐焉世方多難狼子蹈瑕以故及於禍馬隆在圍城中助官防守戰甚力創亦甚劇以家事屬節婦諭之逃曰徒俱死無益也節婦泣不可仰所天死羣季皆遁乃權厝於宅踰年城陷又踰年寇殄乃返夫骨於先塋當是時流離顛沛十室九空節婦出入兵燹間全其弱息不墜宗祀亦若行所無事者殆天之所相與抑其性所發耳雖然可爲流涕矣節婦有子曰光聯復以商起家光遠幼失怙母課之讀補博士弟子員寢昌且熾能亢厥宗光緒十六年壽六十有六以節孝旌於朝建坊如例至今過其地者滄桑更

松潘縣志

卷八 文苑

十二

變猶稱道節婦不衰云論曰曾文正公有言清高宗於疆吏題旌婦女凡烈婦殉夫別具一疏者嘗下詔非之以爲行不貴苟難也然世俗以矯激卓絕之行爲難持論誠過若馬節婦從容履道常變如一庸德之行何所矜異而執是以求於人吾見亦罕此乃天下之至難者耶

清松潘鎮總兵何公傳

溫江縣志

曾學傳

何公諱鑑字貢三湖南邵陽縣人道咸間由行伍投川軍立功累官至副將入籍溫江光緒初署城守遊繫有告謀逆者詞連巨紳數十人護督文格將興大獄鑑請往按卒無左驗叩院力白其誣格猶豫鑑慨然以身保之并繕具印狀事始息成都府試知府李

德良派勇入院彈壓眾憤罷考文督命鑑率精兵一營往諭鑑曰
文童非匪何須兵爲徒行入府院反復開譬并請改員典試大吏
韙其請事遂息尋補城守營遊擊加總兵銜後有巡兵趙雲鵬與
某要人部下博戲齟齬械鬪某要人以此害鑑罷官雲鵬逃逸鑑
復鐫職有親友來告雲鵬所在鑑曰彼罪不應死若被獲必殺殺
人以復官吾不忍爲也其仁厚若此光緒二十二年松潘夷叛總
督鹿傳霖委鑑籌辦糧務事平復原職署阜和協副將先是三岩
夷叛統領韓國秀往征之三年未下制府委鑑率師撻伐鑑單騎
入境反覆諭之勤懇如訓子弟諸夷解甲羅拜請降事聞賞給三
代正二品封典奎俊督川奏署松潘鎮總兵鑑抵任懲壓冒清虧
松潘縣志

空杜供給餽遺復土弁餉額卸番官馬幣設倉儲餉建碉築堡鎮
松年餘無不爲邊地計久遠三十一年總督錫良奏署川北鎮總
兵適拳匪初平州縣查禁習教事綦嚴會渠縣差役誣鄉民某習
拳教往捕傷斃其女眾怒聚抗渠縣令遂誣稟民變鑑聞報密稟
大府大府委鑑檢員相機剿撫鑑曰數人聚眾非真亂也動兵則
眾駭而事成東鄉前車可爲殷鑒乃檄綏定遊擊岑成元就近單
騎入境風使解散果帖服鑑爲人風裁嚴峻造次必以禮治營務
折及纖微不落深刻對親友喜談陰隲及先哲遺言恂恂若老儒
事親孝父疾常左右之自卧起以至飲食溺器皆躬自扶持及卒
痛絕而復蘇者再坐卧不離柩側葬歸伏地不能起枕上漬淚如

膏事孀母甘旨必腆雖小事必稟承而後敢爲自外歸見母言笑則喜怒則長跪引咎旣解乃起母病蓬垢侍湯藥夜禮北斗呼籲願以身代比歿擗踊長號旬日骨立哀慟之情久而不忘娣適羅早寡迎歸同居視甥若己出甥卒又恤其嫠而養其孤凡戚友貧乏者餽助無虛日絕嗣則爲祭掃歲節並祭於家有屋數十間來租者貧減之或概免不納有時反餽以錢米歲饑任賑恤尤力其他慈善事無不在施棺藥衣米不可殫述川中大吏初至者無不欽其爲人卒年八十七子安瀾附貢生試用訓導歷署井研教諭廣元訓導順慶府教授孫邦著附生遊學日本十年精數學見成都高等學校教習論曰何公以兵弁起家位至總戎觀其所爲恂恂然有儒風雖深於學者未之及也豈可僅以將校目之哉盖卓然其爲賢者矣

清封奉政大夫湯公傳

羅德輿

公諱興順字遂齋先世籍陝西咸寧始祖文字入蜀由瀘而灌轉徙松州祖銘清以軍功授同知父廷楹生子四公其仲也幼聰慧有智略通書史嫻騎射旣冠勤治家人生產業母李太宜人勗之曰汝有經世才瑣瑣爲貿遷事殊可惜盍宦遊乎公謝不敏咸豐初太平軍破武漢據江甯東南震動提督雙福檄營務處馬應泰率川兵赴援有薦公者得入襄戎幕駐師巴東由襄陽規進取拔潛江天門等縣公與有勞保六品銜幕中方倚爲重曾得家書以

母病危焦勞甚疾作假歸終養踰年庚申番變圍松城公以鄉團助有司調度八閱月無援兵力竭城陷挈家走隴右倡三路進兵策子身歸上書川督駱秉璋奉批留營效用越癸亥亂平兵燹之餘荆棘彌望尸於野者瘞之燼於火者新之商賈則闐闐之子弟則學校之百廢俱舉多資擘畫而漳臘善後捐金復鉅事聞丁文誠公獎以樂善好施額松地夷落錯綜屢起蠻觸爭公隨總兵夏毓秀三次出關辦理夷人服其信義輒款服然非德行夙著豈易致哉歿後遺籌邊策若干條見邊防志又著有家訓一編傳後卒年七十八有子三人賢明和翁能恢厥家孫七人互相友愛後益昌熾云論曰世有託迹市廛崛起而盡瘁國事利及民生者昔人

蓋難之如湯公豈徒一鄉之賢歟若獲大用當與先正媿烈惜哉其以地限而嗇於遇也雖然迹其行事亦足以傳矣

重修鼓樓岷山書院碑

清同知劉廷恕

松潘在禹貢梁州之域周氏羌地自漢迄明沿革不一雍正七年設撫民直隸廳居民漢少於夷俗好爭鬪非善教以移之殆不足平囂凌之氣也城中舊有鼓樓道光二年被回祿民物因之寢衰岷山書院則焚於咸豐庚申蓋城陷所致雖歷任諸君子志切舉廢然皆議而不果行惜哉予來守是邦巡閱廳城形勢宛如斗柄負山帶水秀軼塵氛固知無鼓樓不足以啟文明無書院不足以興教育良圖旣墜故址就湮私心爲怦然動者久之爰與岐山鎮

軍謀以是舉不可緩毅然捐廉俸令營屬籌金爲之倡紳耆米東陽鄒啟桂沙中聚趙世華李含春相與董其事城鄉士民商賈皆量力醵金共襄善舉先成鼓樓重疊三層以壯瞻視卽以餘金修復書院於光緒元年七月經始九月落成共需二千四百餘金巍然煥然遠勝疇昔是役也鎮軍力爲之民不勞而事成費不糜而功畢蓋鎮軍安邊有年番畏其威民懷其德如唐李衛公風度是不啻籌邊之有樓也爲語邦人士其益砥行勵學發名成業將見文修武飭庶於邊陲有豸

夏毓秀轄夷口修路碑

清王世萬代作

轄夷口者舊傳爲古人禦夷要地懸崖疊嶂下阻溪流山麓徑路

松潘縣志

卷八 文苑

十六

尤險然東達龍郡西達松州實行旅必由之道也夏秋山水暴漲橫截冲刷每令行人躑躅向來駕木爲橋雨淋日炙旋修旋敗俯而窺之深邃幽暗渺不見底偶然失足人畜皆無幸冬春冰雪凝沍成塊纍挂峯巔幾若巨石日映冰墜時復傷人往來經過視爲畏途焉數年以來屢議興修而事冗不果迨己丑春間余往小河營查修城工隄工取道於此踏勘山勢以期化險爲夷爰集居民籌議胥願輸力惟餉工乏貲無由措辦余捐俸廉銀七十五兩以倡中營遊擊陳君時霖董之亦捐銀二十兩爲繼以後捐貲接濟不絕自春徂秋遂竣其事雖飲助有多寡而向義則無異同茲值告成未忍湮其美意用勒貞珉以爲樂善者勸也

李道人修路碑

夏毓秀

蜀西道極艱險自灌歷汶茂至松凡六百餘里其間窮崖陡絕怪石嶙峋以致行人多所損失仕宦商旅視爲畏途有道人者慨然引爲己任募貲培修積十餘年而險道盡坦途焉道人姓李名本善崇慶州籍故習石工嘗傭蜀西諸郡邑目擊險阻卽欲從事修鑿以親老未遑他顧惟日勤工作備饗殮承菽水歡旣畢養乃售器物翛然出塵思償其夙願同治三年遂傾囊積並募貲鳩工兼以躬作審曲面勢於途之橫阻者通之懸絕者補之務使歸於坦蕩紅崖等處則傍岩架木縋險鑿幽所費尤鉅蓋途平而力亦殫矣予以辛巳夏仲來鎮松州詢之士人備悉道人事其募集之貲

同知何遠慶德政碑

徐雲衢

朱子曰德之猶言得也行道而有得於心政之爲言正也所以正人之不正有其心無其政是謂徒善有其政無其心是謂徒法二者皆不足以仁覆斯民也我松地處邊徼萬番環繞自咸豐十一年兵燹後番性頑梗擄掠頻仍商旅往來常懷戒心民生日蹙幾無樂趣其間非無廉能官吏而此邦人士從未有享磐石之安者撫綏誠難言哉何公於庚子之冬來守是邦洞悉輿情下車伊始恩威兼濟斬土酋而悍夷懾志布清聲而荒裔納糧且單騎捕土安寨刦賊擒紅土坡猾虜一時匪燄肅清商旅通行繼以培文風振學校建青雲塔興義學館天和感召雨暘時若歲則大熟訖無

松潘縣志

卷八

文苑

十八

凶告復建倉廩儲麥稌用備不虞此皆公之竭慮殫精撥亂爲治以故軍民戴德漢番從風洵難能矣尤可羨者生道殺民雖殺不怨佚道使民雖勞不辭猗歟休哉其善政善教寓於仁愛實非詞筆所能盡也今公去任有日返轡無時士民感佩弗忘爰爲勒石撮其大端以誌不朽云

夏公祠碑

清李尙昆

於戲仁義之政不修治民者之於民猶秦人之遇越人也久矣若其分不相率其休戚不相及則心尤愬焉方咸同之際重臣宿將接踵於天下戡暴底亂之功偉矣觀其師旅所至往往以厲稱豈不以爲卹民非將帥職而遂恣然以自肆哉至於聲名不彰於世

則又諉罪於民之性情之薄然則彼之性情固獨厚也歟哉夏公鎮松潘先後十餘年遂以上命晉提督昆辱公知愛恆以閒暇與清讌雜論古今事連類語及松潘患者則若有憂容如某事已解則其容怡如也昆退思自歎憶公居松潘之日誠不可謂不久於其地宜相習然固有牧之者幸安輯非總兵勞郎有不利大吏不以責總兵也休戚無所與而憂與怡若不自制者其殆天子之性有異於人哉其真知朝廷建官之意固不問文武胥以奠百姓爲歸提督以下諸職不專爲修備禦設也公不忘松潘人如此而松潘人來者自縉紳士民以逮部吏伍卒但言及公事若靖松坪亂劃四川甘肅界伏拉布郎寺克谷爾壩夷紆臺兵創穀儲立孔子

廟諸事務求有利於松皆若慈母之於赤子不忍須臾離者其誠之感人爲何如哉前乎公鎮松潘者幾人今之父老猶多及見之或不能舉其姓字猶此民此性情也不當於今乃忽增厚則寧有所阿好而然而公之持性情以鞭策人其術誠神其化之所訖且旁及理茂舉熙熙然安耕鑿而無意外之擾也丁酉歲松潘廩生馬光遠蒙春輝湯自新文爲富茂才米家書文成章任光超文耀光太學生哈玉發鄒啟桂文登儒都司張從禮茂州學博王錫綬趙樹清茂才張兆麟及軍功蔣宗漢理番廩生雷震修等以邊陲不靖賴公力無敢蠢其事始松潘而茂州理番亦獲救寧軍民歡呼無識與不識胥銘諸肺肝弗能緩僉議建祠以祈公之壽於天

又以其人皆思慕公不能挽斬公之無去也鑄長生木主於堂其老其稚無賢與不肖苟思公有願見之者瞻於此拜於此庶幾足償松理茂士民無窮之望也以此意告昆丐記祠非古也昔錢鏐王吳越杭州父老列狀請爲鏐建生祠太祖寵之碑文鏐之世無非鏐者公之得人艱於鏐固知世之君子不責禮而累德也雖然不厚性情以予人越制侵分以公爲祖者公之罪人也於是本公之所由得人人所由德公者碑於祠以榜後之來此邦者祠經始三月丁酉至己亥八月成費若干不備及

忠烈祠序

清舉人徐勁岑

國家設政教以保民人民仗武勇以捍國昔魯童汪錡執干戈以

死社稷葬不以殤孔子嘉其志禮也維人受天地之中以生形賦卽理畀有純一理爲主宰與至誠性爲保存卽有堅忍力以操動靜是故陰陽其氣剛柔其性仁義其德惻怛果決其情辨別報施其理昭之以信而人道以立苟有違拂則本所畀賦發縱馳赴自衛國而情不能禁富貴福澤皆泡影曇花孝義忠貞乃英光浩氣文明者完其自有武毅者作其固然雖捐生命仍葆靈神又况名延後世蔭及子孫死不如死較與草木同腐者奚啻霄壤以正氣所鍾之偉人盡其所以還天地而建不朽之功烈此在坊表何可少哉今共和建國凡有勲勞在民者罔不加褒松屬居民素稱強健雖專制時代猶以忠烈受殊榮况今日尙武尤不宜聽其湮

沒明明在天赫赫在地當有以憑之矣茲採忠烈士臚列置祠
非但一邑光抑亦全國幸吾願來者鑒古如今芳流百世也

節孝坊序

徐勁岑

金石匪堅軒裳匪貴繫維節烈萬古支撐精神麗乎日星氣魄鍾
於河嶽有坤德之不貳亦乾性之同光周姜以胥宇開基孟母以
斷機勗教乳姑仰唐氏行孝刃讐全小娥潔貞月寒孫氏之江雲
黯岳家之井湘靈斑竹猶新曹女碑詞絕妙秋嶺則青楓染血春
閨則赤組銷魂歷代女型固云烈矣矧維近世尤可風焉平時嫻
內助之儀臨變表真誠之性或寡居苦節教子成名或嫠處勤工
奉親歸葬或幼齡已嫁失諧柏舟明志或童養許笄未適彤管全

松潘縣志

卷八

文苑

二十一

身此皆人生至不幸之遭抑亦自古至難言之痛也雖云遠徼邊
陲文明或遜屢見行芳志潔義禮自全有曾經褒美暝目九原有
未及表章含悲永世自經採訪悉入坊祠非惟可勵世風更宜大
彰里俗是宜仰止其可忽哉嗚呼地老天荒海枯石爛靈鼈雖戴
野馬難迴鐘鳴鼎食問幾輩到底榮華玉皎冰清賴斯人千秋彪
炳謹勒瑤珉詳稽姓氏岷山岷水同此綿延

重修松潘文廟序

苟春培

東山泗水開千古入室之基聖域賢關肇四科得門之路苟不美
其宗廟何貴望其宮墻我松州文廟左倚青門右鄰重鎮創造逢
羊刼之餘半歸潦草奏公值鳴噉之集徒茂池芹風銷雨蝕殿中

既瓦碎垣頽物煥星移廡下將墻傾屋析將使孔顏失尋樂之處
庚子無陳經之堂欲延鳳起蛟騰之瑞氣象增新宜妥金聲玉振
之靈文明不煥是以鳩工而庇材其如欲炊而無米作新之告功
甚偉經費之生息無多財擬取諸探囊裘須成乎集腋爲告閭屬
官紳商農實心振作量力捐輸有能勝任之家自當慷慨如可撥
用之款亦許通融或因地制宜而興自然之利或備物致用而應
經始之需土木之費幾許瓦石之費幾許子母寧爽乎錙銖經營
之時伊何成終之時伊何辛勤無辭於旦夕從此歌寢廟之安文
風日上儲棟梁之器文運聿新翼能用展天地飛六月之霜羽可
爲儀皇路奮九達之雁謹序

松潘縣志

卷八

文苑

二十二

山川形勝記

明彭 韶

蜀之地南撫蠻獠西抗土番上絡東井下鎖巫山岷嶓鎮其域汶
江出其徼褒斜爲前門靈關爲後戶峩眉爲城郭南中爲苑囿緣
以劍閣阻以石門面越負秦地大且要誠天府之國也楊子雲益
州箴曰岩岩岷山古曰梁州華陽西極黑水南流秦作無道三方
潰叛義兵征暴遂國於漢拓開疆宇恢梁之野列爲十二比美虞
夏牧臣司梁是職是圖經營盛衰敢告士夫集記云禹別九州八
曰華陽黑水爲梁州岷嶓既藝沱潛既道蔡蒙旅平又曰岷山導
江東別爲沱漢地理志言蜀郡湔氏道禹貢岷山在西徼外江水
所出東南至江都入海過郡七行數千里按岷山在茂州直西北

最後番曰列鷺村其村有岷山山之右有嶺曰鐵豹則分水之上源也水二派其一西南入尖囊大渡河其一正南入溢村至石紐過汶川則禹之所導江也鐵豹一名羊膊蓋夷語不同耳任豫益州記言江出羊膊嶺經甘松至灌千餘里是也大抵蜀之山近江源者通謂之岷山峯連岡屬千里不絕今俗謂青城爲岷山者以此續記云凡曰岷嶓該眾山言也凡曰沱潛該眾水言也蓋蜀山之居左者皆曰岷居右者皆曰嶓水出於岷者皆謂之江出於嶓者皆謂之漢或謂之漾或謂之沔出於江而別流別而復合概謂之沱出於漢而別流別而復合概謂之潛古今論岷嶓沱潛者眾矣然參差不齊莫得其真者蓋由不知蜀山之居左者皆得爲岷

松潘縣志

卷八

文苑

二十三

蜀山之居右者皆得爲嶓而獨指茂州之汶山爲岷山金牛之嶓冢爲嶓隘矣

漳臘新記

天下郡國利病書

明羅綺

距松衛治之北百里曰漳臘卽古潘州也城之故址尙存其下有岩穴空洞邃廣可容列騎深亦不知幾許旁有玻璃泉冬夏淵然不涸其土地膏腴山川秀麗蓋自唐盛時所開拓雖隸版圖而土番酋長猶然竊據所謂但羈縻之而已宋元以來無復中國有我朝混一華夏極天極地莫不臣服洪武十一年王師至下潘州入與編民賦役無殊乃於其地建置屯堡使士卒且耕且守累數十年足食足兵邊人安堵宣德丁未守將失馭氏羌蜂起梗我餉道

燹我關塞而潘州復爲所據者凡二十有八年景泰辛未予奉命來鎮斯土不自揣思欲平復之乃大集諸酋陳以逆順禍福無不稽顙聽命於是復增置城池樓櫓戰守之具視昔有加不殫一石之粟不勞一人之力而數百頃沃野遂復爲我有又晏然置城於其間俾兵民雜居累歲豐獲邊人安枕實朝廷威德所及予何功之有焉或者以潘州之城與唐世籌邊樓相頡頏予亦豈敢多讓景泰六年記

曹學佺曰今之漳臘去松州一舍而遙非百里外之漳臘矣前張後弛勢使然也予以庚戌署潘司事料松邊兵食聞韃韃住牧於漳臘城內有百五六十帳殊駭聽聞乃檄漳臘遊擊何奮

松潘縣志

卷八 文苑

二十四

武得回牒云謹按漳臘一鎮五隘九屯一十八墩堡延袤一百餘里襟帶山河雜居夷韃所由來久矣前不具論萬曆二十四年火落赤入寇彼時內有守備張良賢救應以截其鋒外有合壩犄角以牽其勢雖敵眾攻圍鎮邊三晝夜而不能破於時掌堡百戶杜世仁也豈異人任而其父子督兵數百人乃能射死小王子斬首數十級松漳卒賴以無事而合壩遂因之住牧焉續在三十二年廢將李宗望代庖漳臘又有合兒頓奪咱毛兒損等韃接踵投居會治兵使者亦署官也侈然有張伐之意輒撫賞安畝牛馬羊隻布滿山溪毛帳毡房星列草地猶肘腋間眠虎豹門庭內牧犬羊逐之恐釁端自此發聽之恐禍本無所

終也彼其往來松漳之間豈非共我水草利我鹽茶凡倉庫之虛實軍兵之強弱道路之衝要無不盡知萬一生心何以制而禦之惟是高屯堡者在虹橋之內禦寇之下譚屯之西正適中之要地實乃松鎮以北之藩屏也議設把守一員撥唐順等軍五十名以耀威武而坐搯其吭焉誠爲長策矣第當展築屯基寬包隙壩貫路於中不惟容眾且可據險緣由到司覆看得松潘者蜀西之門戶漳臘者松潘之咽喉也自土韃合壩合兒頓等住牧於中毡房毳室以百五六十計貪狼之性馴擾無常非我族類其心必異豈非他日之隱憂哉昔者隋唐之禍可鑒也但卽既來之則安之可以理而諭也方來者所當拒可以勢而

禁之惟是漳臘之鎮邊堡原設把守一員地方遼濶勢本孤懸今且伏戎在內萬有一變聲息不相聞何暇左右顧議以高屯堡要害之處添設把守以遏其衝且與漳臘爲犄角誠策之善者也該堡事務仍令本官兼攝巡視軍兵卽在各營抽選亦無所糜費矣若夫釐行伍除戎器綢繆未雨有備無患此該道將之事也時當事者如議行之

西征記

郭子章

松潘古氏羌地自洪武十一年御史大夫丁玉討平之設松潘衛衛故有二路東路由江油抵龍州西路由灌口威茂抵疊溪鳥道羊腸莫逾咫尺山勢盤錯羌居環列共砦四十有八當事者羈縻

之每歲元日餌以金繒歲不下數十萬鋸羌飽日驕狂逞叵測萬曆初魯賓兔建寺五王城距松潘千里餘羌有白利者述賓兔建寺番地蹂躪作兒革作兒革偪伏而傳賓兔語叩寨以告於是邊吏慮賓兔氛惡有羌中國師喇嘛者黠且健連於賓兔恫喝中國勾引部落雜沓松城內外以千計勢益張諸族牛腦羊腦灣伸占柯等咸附焉鋸木刻合大小姓詛石歃盟時時團結黃沙壩潛伏澗壑中擄掠行旅轉餉及殘殺吏卒膏血塗野草至邀奪總帥車旗殺千夫長百夫長二人乙酉夏楊柳番至太平堡解羊傭市肉食而斃詭云堡人醜之嘯聚諸番六月攻普安堡刳掃水崖掠石門坎擁入金瓶堡要增歲幣格殺百戶陳克勤中丞雒公聞於朝

立帳下指授方畧曰河東西吾力未能畢舉西阻於澗東連五堡
旤在剝膚汝等并擊東勿失又曰賊敗必泥首歸命惟是我眾降
賊尙夥汝等勿妄殺降毋轢擄眾皆唯唯乃行遊擊周于德將潘
州七千人營鑼鍋嶺遊擊邊之垣將西陽兵五千人營蕎壩腦參
將郭成將敘馬兵七千人直抵黃沙參將周文達將平茶兵四千
有奇營茨溝而一統於李將軍二月庚寅味爽將軍誓師鎮坪分
道進兵三月丙申國師喇嘛率灣仲占柯等犯歸化于德伏擊鐵
鑪溝一戰擒喇嘛灣仲守備曹希彬牙將劉繼祖擒占柯綽兒拓
等軍威大振戊申破丟骨又破人荒阿牛阿用卜洞玉琢等寨壬
子文達兵由間道襲克阿孝擒其率刑兒柯東兒柘是日成之垣

各出兵拔龍溪鹿卜乙卯于德兵圍沒舌斗絕賊據險自固我兵
四面火攻賊盡燔死丙辰丁巳諸兵合攻蜈蚣茹兒東路溝盡克
之之垣於茹兒獲其父綸髑髒始嘉靖初綸以松潘衛指揮守北
定關遇害茹兒令鏤其首漆爲飲器至是歸骨松人詫焉四月戊
辰破惡鬧窰溝石柱餘賊遶雪嶺復聚茨崖會諸路進兵至賊悉
委牛馬輜重陷我我兵斬關入賊辟易死崖下河東平公驅諸將
戰河西克思答地等待水漲畫江而陳待我公與將軍策曰彼恃
河爲湯池我誠出不意夜絕江擊之西賊必不支我旣西粟穀必
解回戈東指勢若從天而下此所謂首尾如截應接自難也諸將
爭言卜吉將軍曰羌未見我兵恃河爲固稍遲兵形露賊空壁遁

我卽渡無爲也函誠諸將如期鷄三號悉引兵乘筏渡河薄賊所
遲明賊駭竄猶出死力鬪我兵扼而殺之克思答地標下士唐萬
興射殺前鋒一人卽手刃百戶陳克勤者諸將縱發分擊西坡西
革歪地乾溝樹底雙橋挖撒等砦羌賊走盡拔之甫收兵會食大
雨如注竟三日江水漲筏蕩諸將始服將軍先見云粟谷以兵旣
西備果懈五月壬戌夜旣半成兵襲破其上中下三寨斬首數十
級餘黨遁追至白草乃還甲辰克牛尾牛尾最狡酋合兒結善占
卜豎柵自雄將軍分兵三路之垣遮後文達左拒劉用光右拒宣
慰楊應龍以所部靖兵從中擊之賊據柵壘石下如奔馬諸軍奮
勇先登縱火焚柵斬合兒結父子賊潰我兵追擊之連戰松坪黑
松潘縣志

卷八 文苑

二十八

松林黑水河賊大敗半赴河死得所積稞食軍軍留十日燒其砦
餘稞以歸時東西河俱下殘羌竄崖谷中依偏頭結砦通譯者詣
軍門降請罷兵埋奴受降先後埋者凡二十三人牛尾又出丁平
羌所予銀鏤質於官以示款誠且指示廟子溝所建結盟石碎河
中郭成率眾壘營於黃沙改名平番隱若石城比之無憂焉乃疏
諸將功次於朝上嘉公功晉兵部右侍郎廕一子諸大夫將士陞
賞有差

明司寇羅綺德政記

松潘古荒服地皆吐蕃羌獯之儔髡骨毳裳鳥語垢面歷代有國
者惟羈縻之使無爲邊患而已洪武初置祈命等十四族冠帶酋

長歲貢方物重譯來王正統壬戌虜構亂阻兵經平蠻將軍方政
蔣貴殲之丙寅復命都御使寇琛撫治之景泰辛未虜復叛少司
寇羅公寔任提督松潘兵備幕下連帥十一人統兵數萬計歷戰
而羣校一心入守而百雉齊固首擒渠魁肆以大戮軍民安堵於
是設學校用夏變夷儲鹽糧充實邊備給衣鞋而濟貧寒資藥餌
以扶疾患營設既終咸遂棲止屯田歸復得以耕穫賑青川出俸
廉之銀立禦所爲守邊之計招集生番數萬咸入邊氓追繳雜谷
安撫司印信其餘諸益殆難悉數余聞周之中興申甫作輔方召
平夷見於雅歌今公振英武安社稷莫大之功誠西南柱石矣鎮
守都指揮使周貴躋公行事請勒金石用彰厥德昔寇準決策澶
淵以重望鎮大名北門鎖鑰非準不可富弼使北虜面折契丹不
許割地爭獻納崇國體卒定南北公之勛與方召同符公之望與
寇富並駕顧茲西南柱石豈有異於北門鎖鑰乎蜀民瞻德威佩
恩惠維高且深有如嶽海然則歐陽公所謂德被生民而功施社
稷者其惟公之志歟余與公同朝稔知其出處故爲之記

參府題名記

明檢討王元正

國朝制馭羌番其法甚周以維茂爲松潘南路設右參將主之以
龍綿爲松潘東路設左參將主之協贊松潘總兵守要害遏遠人
於是乎參將之職甚重關中蔣君敬夫以書來告山人曰某守東
路慄慄恐弗勝乃往搜前人名目自成化癸卯至於今嘉靖丙戌

共得一十五人謹以姓氏履歷鑱諸石聳我觀法云耳幸題一言於端山人以罪纍辭倅再至意懇不能違乃畧言曰夫主東路者凡幾人今已既往矣其仁其暴其廉其貪其勇其怯其攻其守其建功其僨事行履之迹人言歷歷乎耳可聞也又乃加諸石則赫赫乎姓氏之昭白日可睹矣聞諸耳也復觀諸石人焉廋哉是則可畏已也夫畏焉而思齊則可苟若小人之無忌憚也人之言弗我恕石肯爲我揜歟斯不又無窮之畏也夫敬夫嘗爲茂州遊擊將軍愛下而廉去後人思之今主東路汲汲用心若此蓋非徒畏者也謹記

西岷保障圖記

全蜀藝文志

明周洪謨

松潘縣志

卷八

文苑

三十

蜀爲坤維大都會三面鄰蠻焚番羌南則夜郎靡莫西南則邛笮西北則冉駹冉駹有六夷七氏九羌卽威茂二州地也又其西乃爲松潘松潘之西北爲吐蕃東南雜氏羌種落旣繁險扼彌固羣夷據巖嶂以爲邛籠碉礮善製堅甲勁弩行巖壁捷如猿猱凡蜀民之轉輸松潘者常掠於道其爲蜀患從來久矣然而松潘竟能深入而堅其壁壘者蓋以據羣夷之奧室而柱其門戶故羣夷不敢覬覦成都以有松潘在也四川都司指揮使周公貴往歲奉勅備兵其地方蠻酋董布等出沒公屢禦之而夷黨刦奪軍餉公又能親督矢石搏殲其眾公聞於朝遣使賞勞由都指揮同知進今職士君子有繪圖獻之者題曰西岷保障蓋以嘉公之功而繫之

曰西岷以松潘在岷之西也雖然蜀邊要害固莫若松潘松潘既靖則全蜀靖矣是西岷所保障者豈非全蜀之保障也哉繼自今尙其益殫厥心益遠乃籌使吾蜀永倚公爲長城可也公有勇畧善撫士卒自藩憲大夫及閭巷士庶皆稱其賢公之先君子有功太宗朝積官如公今職宣德間公蔭補成都後衛正統間征麓川孟養有功擢官都司公不惟克樹忠烈又可謂克紹先美矣公以圖來屬爲記故書以歸之

文廟碑記

清學政會王孫

蜀自文翁啟化俗比鄒魯賊焰旣熾變動所在文廟皆不可問今年冬十月松潘教授張其赤率諸生張良佐等以重修文廟碑記

松潘縣志

卷八

文苑

三十一

來請曰衛舊有學垂二百載亂後鞠爲茂草蓋數十年於茲矣總戎卓公來鎮斯土慨然以修復爲己任於是率將校及衛守與其赤良佐等共勦厥成經始於康熙三十四年春二月十有九日成於秋八月朔日自大成殿啟聖祠及東西兩廡櫺星門月台角屏煥然更新足以示瞻仰於邊陲明聲教之遠訖微總戎無以致是也余於是歎總戎崇儒重道能以身先之所謂修明樽俎之間折衝千里之外者非耶考諸圖誌松潘爲古氏羌自漢通西南夷叛服不常明初始平至景泰三年建學宮由是置博士弟子員登聖人之堂爲聖人之徒豈不幸甚顧地極寒薄不產嘉穀聞士子讀不廢耕以供事畜蓋異常辛苦矣夫生瘠土者勞而思之卽善心

生今諸生入廟而思敬奉庠序之教朝夕黽勉求不詭於聖人將進此邦以禮義不旣燦然君子哉夫表章興學明倫以啟學者學臣之責也而總戎乃首崇是舉是誠不可以無記卓公名策聞之惠安人衛守備爲賈尙謀博士弟子張良佐而下凡五十八人例得備載

西行記

清劉紹旂

乾隆九年三月十三日制府慶上公偕余赴松潘出成都西門三十里過犀浦一望平疇溝洫夾道流水潺潺澄澈可鑑或砌堰灌漑或竹竿接引或浸淫橫界岸上楊柳排列無際垂綠千條依依拂人樹下月季吐紅丁香布素與綠草相映盈渠野卉圓莖長葉

松潘縣志

卷八 文苑

三十二

似讓而花白土人不能名二十里曰郫縣少陵詩酒憶郫筒不用沽者是踰縣經崇甯境水木清華風光如昨時維暮春菜甲豆肥蕎繁麥穗爛如雲錦人居濃陰中微露屋角茅茨傍溝塍薜荔延其上周籬種木槿芭蕉爲蔽饁婦餉童遲迴隴畔因誦邠詩七月怡然樂之將近灌縣忽青城聳翠灌口流聲不覺耳目一異縣城半倚山不五里有二郎廟祀秦守李冰子二郎史稱鑿離堆辟沫水之害今爲都江堰蜀人德之歲時歆享離堆在其南從公不獲往沿江行崖壁間自是無平壤矣三十里爲尤溪溝樹木茂密多佳茗葉細味清過松羅溝上娘子嶺曲折陡峻四人肩輿八人執索牽之望硬頭灣山愈高水愈壯徑愈仄陰森不日居者迫山趾

水次不能一畝歷興文坪抵飛沙關黃塵迷目大風幾挾人去到
汶川蠻酋列陣來迎酋長衣冠如中國其卒衣皮鎧繪虎文帽以
毡裝綿數寸龐然大也云可避刃插羽其上以多寡有無別貴賤
其器執矛則操弓小如弩鏃旁有鈎入肉不可出執盾牌則操刀
鋒尖而直能刺不能擊其人瘦小黧黑輕健似猿獠善走而少力
其民往來各州邑負竹兜衣韞童稚納焉男垢面女袒裼赤足耳
垂銅環大於掌或擊之腕每以十月出傭三月歸巢汶茂皆有之
而保縣獨多縣城舊在江南有李德裕籌邊樓圯於水里籍不滿
三百一都司守令寄治威州佛寺以事過江度藤橋其橋縛藤索
十數綿互江上覆以版甫履卽動風來益蕩又有溜索攢竹編成

雙股橫江首高尾低作斜坡形渡者於竹版摩極滑雙手按索上
亦極熟藉高下勢滑而迅走要須腕力否則墜諸士司來謁皆襲
於明一襲自唐考譜牒良然孔子言夷狄有君論者以爲一時感
慨詎知萬世後猶不爽耶唐至今千餘年中夏易幾主而土官如
故因與上公喟嘆者久之須臾過雁門關左倚山右傍江一夫扼
險可敵百人晚宿文鎮次日至茂州一副將與牧併治人稍密然
地寒不植物唯雪梨蘋婆牡丹甲於蜀人家壘小石爲牆泥封其
頂不蔽雨雨後揮木槌四五次乃堅前經疊溪遊擊居焉中間當
路不十里一堡堡以石明季獻賊不到故完好官道兩旁猶有頽
垣云築邊牆護諸往來堵禦竊發當時稱便見古防邊之嚴過鎮

江關山勢忽開豁是爲松潘卽唐松州或曰產松或曰赤松子遊
今有赤松觀潘州在郭羅克明失其地退而併名一總兵鎮之俗
貴牛羊牛性不馴見人輒觸常以索繫之楯可食不可使毛尺餘
作纓名曰牦牛羊經冬乃肥春夏疾瘧蠡無他蔬惟苦蕒可茹自
興文坪至此風氣畧同山高而童狀不一或土或石或石戴土或
積沙望若朽腐多穴罅類蝕凜凜懼仆江心亂石槎枒水不能竟
過湧而立搏而沸盤洄而破碎激而鳴如萬鼓如驚雷人行岸上
對面語不聞無五穀獨青稞青稞粦麥也未熟而寒故不黃米自
灌縣運入味多變沿江爲路於山腰鑿孔橫受木架板旁立木以
支空其下古云棧閣俗呼偏橋夏秋水漲飄沒不可尋攀崖谷趨
趨而已過午風起居者闔戶猶有飛沙擊牖行者瞑目早行避之
其地惟沿江一道通行旅者屬中國兩旁山上雖聲教所及而隸
於番松潘亦一城城四圍皆番眞所謂一綫望中原者是孤鎮宜
益兵上公曰善

通遠橋記

葉惠三

古橋春漲爲松州八景之一在東關外有橋曰通遠古名也下接
茂汶上連吐番雪山對峙岷嶺拱環玉壘羅後金蓬列前睥睨鑪
峯咫尺龍潭二十五州之要道四百餘砦之關鍵長橋卧波江水
潺潺古松映月鼎足而三惟惜乎經營締造不知始自何年其在
上古蠶叢闢國神禹導江初啟鳥道未成徒杠下逮周秦及於漢

唐相度地勢剏建輿梁中朝用兵撻彼氏羌將軍靖虜可汗歸王
往返士卒輜運械糧宋元迄今多事西方既有斯橋之利濟自不
興歎於望洋甚至夷漢互市商賈馳驟孺子進履丈夫題柱送客
萬里驂駢上路過斯橋者不知其數是故以地理言之則有取乎
通以年代之則有取乎遠古人以通遠名其橋誠名實兩副也
雖屢經兵燹而橋名仍舊亦存古意耳辛亥番變橋燬邑人醵金
重建功既竣爰約畧爲之記

松潘縣志卷八

物產

植物類

穀屬

稻 即飯穀產縣屬南坪小河

秫 即酒穀性粘可釀酒產南坪

小麥 有二種秋九月種次年八月收者名冬麥穎圓色紅春

三月種秋八月收者名春麥穎條色淡紅均宜種平原

青稞 穎圓頭尾尖色深青宜種山原各番寨地廣種之官倉

儲糧以此為最

松潘縣志

卷八 物產

一

小青稞 一名藍麥穎似青稞而條色藍秋九月種次年秋七

月收平番以下及大小姓各番寨多種之

芋麥 一名包穀色白者產小河色黃者產南坪平番

蕎麥 一名苡子有甜苦二種產南坪小河

膏粱 一名蜀秫一名蘆粟產南坪小河

油麥 一名雀麥產南坪小河平番

菜子 脂即清油渣為油枯雜糧中之上品產南坪小河

草白

荏子 白蘇也可榨油產南坪

粟米 一名龍爪粟產南坪

糜子 一作糜產南坪

漫穗 俗呼干穗子產南坪小河

山麻 產縣屬各夷地可製爲布作衣囊適用

豆屬

胡豆 一名蠶豆有紅白二種

豌豆 有白麻二種

黃豆 有大小二種產南坪小河

綠豆 有皮綠及穿心綠二種產南坪小河

黑豆 大者名羊眼小者名葯豆產南坪

爬山豆 蔓生一名小豆子產南坪小河

蔬屬

蘿蔔 一名蘆菔有枇杷葉熱蘿蔔花葉子冷蘿蔔二種

菠菜 一名菠薐

萵笋 一名萵苣有青白二種

蘆苳 一名胡苳

葱 一名荖葉中空色青根莖白有羊角葱火葱二種

蒜 氣臭而辛嫩爲蒜苗老生蒜苔蒜其根之結瓣者

白菜 一名菘有黃芽白菜青皮白菜二種

韮菜 有線韮馬練韮二種線韮葉細窄馬練韮葉寬厚味皆

清香

莧菜 有紅白二種縣產惟白莧南坪則產赤莧紫莧

恭菜 一名蒼蓬俗呼圓根菜

芹菜 有青白二種白者其味清香

羊芋 一名馬鈴薯有紅白二種近有洋羊芋一種盡紅色而味劣

蓮花白菜 一名包包白菜經霜始熟味最美

胡蘿蔔 卽紅蘿蔔根葉似葎有紅黃二種

蒟蒻 俗呼鬼芋磨作黑豆腐始能食產南坪小河

海椒 番椒也味辣俗呼辣子產南坪小河

花椒 一名藪產南坪小河

茄子 一名落蘇產南坪小河

松潘縣志

卷八 物產

三

青菜 紅者爲諸葛菜產南坪小河

羊蹄菜 一名禿菜產南坪

南瓜 形匾色深黃老則味甘產南坪小河

白瓜 南瓜之別種形長色青白子與南瓜子同邊有線紋產小河平番

豇豆 一名薑豆其莢必雙生長尺餘產南坪

二季豆 一名豆角有紅米白米二種產南坪小河平番

刀豆 形似小刀長五六寸產南坪

苦瓜 別號癩蘿蔔產南坪小河

黃瓜 原名王瓜月令孟夏之月王瓜生老則皮色黃故名黃

瓜產南坪小河

冬瓜 一名枕頭瓜形似枕頭皮色青老則生白灰產南坪

越瓜 一名菜瓜產南坪

絲瓜 一名蠻瓜一名天羅產南坪小河

金瓜 一名京瓜形似南瓜而秀色金紅嫩時刺字皮面即長
成紋可供玩品

以上皆家蔬

蕨苔 嫩時獨莖直生其葉未舒曲如雞爪因名蕨雞苔

苦菜 季春季秋之月多生麥地中味苦鹽熟則清香

鹿耳葱 生山麓間葉形似鹿耳味似葱故名

松潘縣志

卷八 物產

四

黃花菜 一名地丁草其味苦月令孟夏之月苦菜秀即此

碎米菜 葉似黃花菜而細其味淡仲春之月可採食

灰灰菜 葉微圓青色生白灰味似菠菜

苦馬芽 葉長曲其根如豆芽而肥大色純白味生苦熟甘

椿芽 即椿枝初生之芽氣味香厚

枸杞芽 即枸杞枝初萌之芽亦可採食

以上皆野蔬

木屬

松 幹直枝疏葉銳如針皮厚生甲者名鐵甲松皮光潤青色者名青松枝幹微小葉如細絲下垂長數寸者爲馬

尾松老山大林皆有松木高百尺者極多

杉 枝幹與松畧同而葉稍秀皮細色紅木心含香氣者名香杉皮粗蒼老心無香氣者名藥杉多雜松林中

柏 幹高聳枝繁葉細密皮薄順絲起層木心及葉焚燒吐清香氣俗呼柏香黃龍寺山林此木尤良

桑 幹直枝抽條葉圓大而尖氣清香宜飼蠶產南坪小河
白楊 幹高直枝疏葉圓皮青光潤多生山陰及溪澗處

楊柳 幹空挺枝多斜稍垂條葉細長花開如絮多生隄岸又一種枝幹皆遜生水邊名水楊柳

椴 枝幹榮茂質紋細緻作器具之良材產小河南坪老

中林

樺 幹高直枝葉細小皮色黃有小斑柔紉用途甚廣

榆 有莢如錢木有赤白二種白者別名粉產南坪

杪羅樹 枝幹斜曲高五六尺葉似枇杷背有毛花開白色大如茶蓋

香柞樹 細小叢生高二尺餘葉圓長氣香如檀名樹香花嘗採入貢

槐 幹高枝葉茂密花似蝶形實爲長莢產南坪

椿樹 枝幹高直質堅細色紅氣香葉初生時名椿芽可採食
產小河南坪

桂樹 卽木樨有銀桂金桂二種秋八月開花香氣聞遠產

坪南

漆樹 枝葉粗散幹擁拔皮多汁割取之名漆用以髹器堅滑而光產南坪小河

青桐樹 質堅實有大葉細葉二種產平番小河南坪

皂莢樹 幹高聳枝密多茨其莢有強質退油垢名皂角產南坪

竹屬

箭竹 高長八九尺大如巨指者名柺棍竹小如筆管者名月月竹

筋竹 有黑白二種節促而堅體圓而勁產南坪小河

慈竹 小者一種產南坪

草屬

松潘縣志

卷八 物產

六

黃風草 高尺許葉如毛有汁

香靈草 高二尺許葉莖最香揉放蒸餅中勝於桂滷

青茸草 葉長尺許如茅可飼畜

醉馬草 高八九寸葉似蘭而窄無花無實

鬼鐙盞 高二三尺圓莖大葉花小而紅結實如鐙盞形

五朵雲 高七八寸莖中有汁

指甲蓬 生於墻崖瓦縫間又名馬齒莧高三四寸花與葉最小開時色黃如金

水鐙心 高五六寸一莖直上無枝葉

土羊藿 高七八寸葉形如青桐多刺結實如鈕

蓴麻 名蠍子草莖葉有芒誤觸之如蜂螫通名毛茛

白蒿 八九月開小黃花成簇徧山谷氣香如菊

花屬

牡丹花 爲花中之冠產縣屬南坪燦爛可觀花色有數種其最

佳者惟白色花繁而氣香根卽丹皮入藥品

芍藥花 一名殿春花有縷金囊最香絲等名根卽赤芍入藥品

蘭花 蘭爲王者香有春蘭夏蘭秋蘭雪蘭等名縣屬小河城

有蘭花山蘭徧山谷花放時香傳數十里

蟾花 花葉似蘭而茂大無香氣產小河

梅花 有數種縣屬南坪只產紅黃二種

松潘縣志

卷八 物產

七

海棠花 有春秋兩種

雞冠花 有紅白二種

水仙花 一名金盞銀臺蓋水仙單葉者中有一盞深黃而金色若干葉者乃眞水仙也甚少

五簪花 古名**替**蓉一名白鶴仙花中空而色潔白香最清幽花

形似白玉簪故名

茉莉花 莖高三四尺葉如卵而稍尖單瓣白花夏日盛開以之沁茶香可耐久

芙蓉花 木本花開於秋甚豔花瓣有粘汁能解瘡毒

玫瑰花 花紅色雙瓣者其香清烈可以蒸露浸酒

黃羅傘 葉尖花小如豆每枝數十朵攢立於一莖之上色黃金如

棋盤花 高四五尺葉如土萆花色紅單瓣

菊花 百三十餘種臨秋始開枝能傲霜縣產惟紅紫白三種
六月菊一種產南坪

薔薇花 有黃紅白數種枝節多刺又名刺紅藤春夏盛開香馥
迎人

鐙盞花 高尺餘花形如鐙盞又名金盞花

蝴蝶花 高數尺花形如蝶有紅藍紫三色

串枝蓮 藤生葉似菠薐花層複色白微紅最嬌媚

荷包花 高八九寸葉如芍藥花色淡紅形如荷包兩旁有三雄

松潘縣志

卷八 物產

八

蕊下垂如繡然

石竹花 莖葉皆似竹花紫色

鳳仙花 卽指甲花有紅白二種結實名急性子

大黃花 卽藥品大黃之花也

西天花 高尺餘葉如蒿艾花開紅白黃三種單層四瓣亦有複
層者

水苗花 卽野芍藥花瓣單層

糯米花 木本樹高丈餘花如糯米每枝數十朵攢簇而成氣清
香卽野桂花也

金鉤蓮 高尺餘葉似荷花開四瓣金黃色

萱花 一名忘憂草葉長如蘭而寬花如捲筒色黃俗名綠蔥
花又名土黃花可食

捲筒花 形似龍爪金黃色中有黑點

雪蓮花 生於崇崖積雪處花大如盤係葉片簇合而成片上生

白毛似棉而輭形與蓮無異可充藥品有雌雄相配成
對之說

狗舌花 葉細而尖花紅色四瓣倒垂如狗舌故名

革故花 俗呼腎囊花葉細長花紅色中有甘汁

果屬

林檎 俗呼花紅秋熟味甘色紅鮮縣城及平番甚多

松潘縣志

卷八 物產

九

杏子 一名酣梅赤大而匾謂之金剛拳其仁味苦能瀉肺氣
入藥品

延壽果 俗呼足麻苗高二三寸生山野間根中儲最富之養質
春二月苗初萌掘其根乾之即延壽果也

枇杷 秋九月開花次年初夏結實產小河

桃 有紅桃緋桃白桃數種產南坪小河

胡桃 俗呼核桃產南坪小河

梨子 有雪梨鵝梨香水梨等名產南坪小河

石榴 結實下垂形若贅瘤故名產南坪

櫻桃 一名荆桃又名含桃產南坪小河

蘋果 形似林檎而倍大味純甘亦清香產南坪

葡萄 大者名馬乳又名牛嬾尖者名雞心圓者名鈕子產南坪

枳椇 俗呼拐棗一名木棗解酒俗云園中有枳椇家中無酒好

柿子 生食甘滑冷利去皮乾之則名柿餅甘寒而澇

羊棗 卽羊矢棗俗呼軟棗大如拇指初熟味澁經霜則甘

木棗 葉如卵形而色黃有紅黑二種產南坪

無花果 不花而實人多種之治痔產南坪

藥屬

鹿茸 鹿之初生血角也在伏日得者元氣充盛名嫩血茸甘

溫壯陽爲溫補之峻劑外有鹿筋鹿葱鹿胎等品俱能

助陽

麝香 公麝之臍也納蟲蟻蛇頭釀結而成塊粒者香氣逼人

其性開經絡通諸竅李東垣謂能搜骨髓之風

牛黃 生犏牛牦牛膽中牛有黃必多吼喚惟生吐出者最佳

性甘冷祛風利痰

熊膽 苦寒涼心平肝

黨蔘 甘溫補中益氣夷寨阿壩產一種形如佛掌

黃芪 夏開黃花結莢如赤豆根入藥品補中氣

當歸 補血和血

大黃 大苦大寒能下有形積滯

貝母 一名蟲三月生苗七月採根有剪刀夾樹兒子鐙籠花
一疋草四種惟鐙籠花開紅花其餘不花甘寒瀉心火
散肺鬱

泡蔘 一名沙蔘甘溫能表能補

羌活 甘溫散肌表八風之邪

秦艽 苦辛燥溼散風

甘松 味甘而香叢生山野葉細如茅根極繁密光明經謂爲
苦彌多理諸氣開脾鬱

大母藥 俗名雪蓮花生雪山石塊上有雌雄二種大補元氣婦
科要藥

松潘縣志

卷八 物產

十一

藍布羣 能治腳氣壯筋骨

五加皮 縣北紅橋關出者佳皮盡細刺色紅名紅毛五加嘗採
入貢能治風溼腳氣

蟲草 春在土中身活如老蠶能動初夏則尾出土爲苗身化
爲根保肺益腎止血化痰

茵陳 蒿類化痰經冬不死利溼熱去諸黃疸

細辛 辛溫散風寒

麻黃 發汗峻品

柴胡 發表升陽解鬱

前胡 氣香味輒解風寒

赤芍 瀉肝火散惡血

木賊 一名筆管草能去翳膜

土茯苓 俗名冷飯團

天花粉 清熱解毒

土枸杞 味酸遠遜西產根卽地骨皮

藁本 辛溫性烈能去風寒

五味 性溫斂肺瀦精

澤蘭 行血

黃精 補中益氣

丹皮 涼血

松潘縣志

卷八 物產

十二

豬苓 行水

遠志 能通腎氣上達於心

菖蒲 通竅一寸九節者佳

牛膝 其莖有節似牛膝性下降補肝腎散惡血

杜仲 壯腰膝

升麻 升陽解毒

甘葛 發汗止渴

紫蘇 發表散寒

黃芩 夏開紫花根入藥品解熱

薄荷 方莖葉卵形而尖發表止咳

荊芥 氣香而散一名假蘇

小茴 有家野之別實圓而長清香可理氣

藿香 去惡氣止嘔逆

厚樸 平胃理氣

黃檗 清三焦火能染衣

威靈仙 行氣祛風

芫蔚 卽益母草行血

夏枯草 性涼治瘰癧

桑寄生 壯腰膝

骨碎補 堅腎行血治折傷

松潘縣志

卷八 物產

十三

何首烏 斂精氣養血祛風

旋覆花 消痰下氣

款冬花 化痰止嗽

金銀花 蔓生清火解毒

白附子 燥毒之品祛風溼

香薷 俗呼地胡椒清暑退熱

車前草 芡苳也詩云采采芡苳卽此利小便

牛旁子 一名大力一名鼠粘又名惡貫

陳艾 名冰臺形似蒿純陽之性通十二經逐寒溼陳者入藥

王不留行 俗名吹吹草行血下乳

野百合 根似眾瓣合成形如蒜亦能清肺

瞿麥 利水破血

菘蓉 馬精墜地而生補腎

老鸛草 俗名鐵雞公又名劉季奴詳見晉代事畧其草蔓生稍

類牽牛結實甚小若雞嘴金瘡用藥

雪茶 產縣屬黃龍寺性涼退火

大救駕 梗葉俱香跌打要藥

萬年青 葉長大無莖結紅實一名菖瀉熱

蒲公英 一名地丁草一名黃花菜清火解毒

菌屬

松潘縣志

卷八 物產

十四

香菌 卽白芨菰蓋圓秀莖細色純白氣味甘芳產口外者名曰口芨尤佳

口菰菌 蓋圓厚大莖肥短味鮮美生草山聚陽氣處

松菌 蓋圓莖直色深黃味淡有松脂氣生松林外淺草內又一種畧似松菌蓋有白毛其味辛名辣辣菌

黃絲菌 蓋尖圓而潤莖長色金黃味甘滑生深山茂草地

麋子菌 蓋平大色青黑裏生細毫如麋毛味甘細嫩生深林當陽地

羊肚菌 圓長似棗中空皮紋如羊肚味甘鮮產南坪

雞爪菌 一名刷把菌頭分細條如爪莖並生有白黃二色味甘

似雞肉生林間朽木邊

松耳 形似人耳色黑較雲耳濶大堅厚生朽松木上

動物類

羽屬

雞 一名德禽雄者首有紅冠羽多彩色尾長色青能司晨
雌者有黃色黑色麻白色三種又有雌雄盡白羽者名
白雞骨盡黑者名烏骨雞

鵝 一名舒雁頭頂色黃身圓長尾短爪連趾有白麻二種
善叫聲洪能避蛇蟲

鴨 一名家鳧蹠趾短足嘴平匾雄鴨頭方色綠身羽色青

松潘縣志

卷八

物產

十五

雌鴨羽多麻色嘗生蛋性皆喜水

以上皆家禽

雉 一名野雞雄者臉紅羽多紅綠彩色尾直長尺許雌者
羽盡麻色尾稍短

馬雞 雌雄無辨羽皆藍色臉紅耳際有白羽寸餘豎生爪紅
尾長有翎線尾四莖

貝母雞 形大於鵝羽毛青白相間產草山中嘗啄食貝母體肥
壯入食品能滋補

雪雞 形似野雞微小麻色近尾際有紅綠花羽尾短直僅三
四寸產積雪山野

半雉子 羽色青麻而尾短其形僅有野雞之半因名

燕 一名紫乙一名鷓鴣春來秋去巢於人家梁壁莊子鳥莫智於鷓鴣又有一種石燕常棲崖邊

鵲 俗名喜鵲亦稱乾鵲

鳴鳩 布穀鳥也穀雨始鳴夏至乃止其聲如割麥插禾縣屬南坪始有

烏鴉 純黑反哺者謂之烏小而腹下白不反哺者謂之鴉

鵲鴝 俗名點水雀似燕而青灰色喜食害蟲常住水邊止則動搖其尾

鵲鴿 有家野二種家鴿乃野鴿之變種性戀舊飛行甚健越

松潘縣志

卷八

物產

十六

千里不迷故巢

鷓鴣 俗名黃脰雀一名桃蟲善鬪

簷鵲 卽麻鵲

鵜鶘 俗名漁老鴉一名淘河漁人用以捕魚

鴛 俗名斲木官嘴直而銳舌端有鉤足四趾前後各二雄者身有斑紋雌者褐色常斲食樹木之害蟲

鷹 猛禽也一名爽鳩獵者用以捕禽雉兔

鷗 貓頭鷹也一名鷗鷗俗呼鬼登歌眼圓似貓而巨耳生長毛晝伏夜出捕食小鳥與鼠

鷓 猛禽也食小鳥及雞雛

鷓 鷓鳥也似鷹而大體長三四尺全身暗褐色嘴壯大而
鉤曲平展兩翼可達丈餘常攫食山羊等物又有一種
稍□名岩鷓

鳧 □鴨也於水面飛行啄食

拜天雀 較鷹雀小其飛倏上倏下故名

鶻鷓雀 又名花臉雀大者名胡敬德

土畫眉 亦如畫眉而音不及

朱衣鳥 全身紅色其音云貴妃醉酒

鴿下紅 大如鷓雀全身褐色惟鴿下紅燦可觀

麻蒿雀 全身麻褐色大如麻雀眼如畫眉有□□□

松潘縣志

卷八 物產

十七

相思鳥 大如麻雀色紅

陽和鳥 麻斑色大如鳩常飛水邊

凌波鳥 俗呼打漁郎大如鳩灰色嘴長二寸能入水縣屬小河
有之

泥丸鳥 較偷倉鳥更小棕色性好鬪又呼爲牛屎雀常棲崖罅
以上皆野禽

毛屬

馬 馬爲地精乘騎善行縣屬内外地廣產良馬

騾 騾馬相交所生負物之力最大

驢 似騾而小耳頰特長其力則遜於騾亦能負物

牦牛 一作犛牛毛黑深厚尾毛甚多其性不馴亦能耕馱但未嘗專用之

犏牛 牦牛與黃牛合則生犏牛或牦牛黃牛與犏牛合亦然言得一偏之氣也其性馴其力大專用馱負行冰天雪窖中不畏冷雖數日無水草猶馱二百餘觔行走不衰真邊地之寶畜也

黃牛 性極馴可耕可馱惟力較犏牛稍遜

綿羊 一名跳羊毛皆環絲色白角如螺旋而長縣屬夷地養畜以此爲最戶有養千頭者以之產小羊嘗剥羔皮爲業又一種似綿羊而小近地漢夷多養之名當地羊

松潘縣志

卷八 物產

十八

石羊 一名山羊身小毛順長有黑黃白數種角直短項下有鬚亦惟近地漢夷多養之

犬 俗呼狗敏於嗅覺聽覺用以守夜極靈夷地產者大而猛倍於常犬聲洪壯名鬧獅狗

豕 通謂之豬小者爲豚性濁無所任用惟飼肥供人宰食貓 一名家豹其頭大毛深長者名獅子貓性馴見鳥鼠則攫食之

以上皆家畜

豹 狀如虎而小其毛文有紅春艾葉金錢三種常捕食獸他鹿 性善驚頭生肉角爲茸在伏日者極貴至秋冬則老爲

角惟牡鹿有之牝鹿則無又一種名麋亦生茸不甚貴
麋角冬至解鹿角夏至解

狚 野馬也似馬而小曰行數百里

麋 似鹿而小無角牡麋之臍內釀結者爲麝牝麋則無

麂 麋屬喜跳越革柔韌可拭物

熊 猛獸也有馬熊人熊狗熊猪熊數種縣產僅馬熊狗熊

猿 小者名猴狀類人縣屬產芋麥之地嘗有之

狐 似犬而瘦毛深溫厚背金紅腹白性多疑穴居山野不

輕出又有一種沙狐其毛稍遜

狸 野貓也有數種一種尾毛黑白錢文相間名九節狸一

種俗名麻羅子毛稍次

貉 形似狸頭銳鼻尖毛斑色深厚溫滑俗呼兔兒牲

虎狸 一名地虎其油能去風溼俗名土狗

線狨 似猴而小背毛長數寸製褥毯最佳

豺 狀類犬體瘦毛長貪殘之獸也

狼 大如犬身瘦頭銳口尖喙長性殘忍食人畜

犏牛 野牛也項上肉隆起身極大家牛莫能及

兔 其毛白黑黃褐不一縣屬所產惟麻色一種

鼬 俗名黃鼠狼喜攫雞鴨吸食其血尾毛長健可製筆

屎貂 一名貂鼠居巖穴間能直上樹尾大於身軍士用以飾

帽名貂尾

鼠 毛色灰褐晝伏夜出性善盜竊

鼯 俗名田鼠一名隱鼠善積蓄穴中常有糧

獾 俗呼雪猪其皮可避風溼

獾 野猪也

以上皆野獸

鱗屬

鱈魚 卽細鱗魚形似鯉魚而條大者尾淡紅

鰱魚 一名白鰱子身無甲白青色微有斑點大者僅六七寸

鱖魚 卽石斑魚形似鯉魚俗呼石巴子

松潘縣志

卷八 物產

二十

鱖魚 味佳與松江鱸魚同俗呼牙魚產南坪

鰕 節肢動物體多環節產南坪

蛇 毒蟲筒形長尾全體有鱗舌兩歧齒如鉤伸縮行動脊以

水獺 恒居水邊穴中夜出捕魚俗呼水貓子

青蛙 俗呼田雞背光平色綠目精突出夏夜輒鳴其聲如鼓

蟾蜍 俗呼癩蜞螞背多磊塊眉間有脂擠出之卽蟾酥

蟲屬

蝴蝶 種類甚多形色大小不一常飛舞花間

蜻蜓 六足四翼腰尾細長產縣屬南坪

蜘蛛 節足動物常於空中結網捕食飛蟲

蜈蚣 多足蟲也有毒螫人

壁螻 黑褐色巢於牆壁間形如錢

蚜蟲 種類形色不一吸食植物液

瓢蟲 半邊形食蚜蟲以爲生活

蚯蚓 體有環節圓而細長上食槁壤下飲黃泉即此物也

蝸牛 一名蛞蝓體動物之一種身藏螺旋形之殼中有肉

角二常食樹葉苔蘚

蛾 蛹所化亦常飛舞花間

蜂 有畜於家者有巢於岩者均採花釀蜜又一種名黃蜂作房樹上不釀蜜尾有毒如針螫人

松潘縣志

卷八 物產

二十一

螢 腐草所化尾部發燐光

蟻 螞蟻也一種有翅能飛名曰蠶

蠅 飛蟲種類甚多卵落肉上卽化蛆

蟲 夏秋出而嚙人縣屬南坪產俗呼蚊蟲

礦物類

砂金 產縣屬對河寺小姓溝等處

銅礦 產縣屬北路踏麻等處未開採

雄黃 生山之陽色似硃砂稍遜解毒殺蟲

硫黃 大熱純陽能化鉛爲水修煉家製爲金液丹

煤 產縣屬東路三舍等地未開採

雪晶 積雪凝成長圭形或六楞或五楞亮如水晶產雪寶頂

山上

土貨類

鹿角 鹿至秋冬其角自解歲產出萬觔

野牲皮 狐皮狼皮狸皮三種爲上兔兒牲麻羅子沙狐次之歲

出千餘張

牛皮 縣屬内外地所屠之牛

騾馬皮

老羊皮 凡屠宰綿羊之皮歲出萬餘張

羔皮 小羊兒皮也爲普通製裘之用歲出三十萬張

松潘縣志

卷八 物產

二十二

羊毛 卽綿羊之毛爲縣屬特產歲出二百餘萬觔

酥油 取牛乳之精製成元和志松州貢牛酥

孌餅 亦牛乳之精製成較酥油更佳

孌渣 卽取過酥油之渣滓也細嚼有味補性毫無

土鹽 卽潮鹽縣屬夷地有小海其水潮溢遂結成鹽

青鹽 一名戎鹽顆成稜形味較土鹽更佳產青海

蜂蜜 產於巖間最多

松潘縣志卷八

祥異

明萬曆十二年閏九月地震

十六年冬十一月東方一星形如刀環先啟明星見光耀如晝

三十三年夏五月天火墜

三十五年秋七月地大震數日乃止

三十八年夏四月地震

泰昌元年冬十二月晝暝自辰至酉踰年春三月西山林木自焚

幾三十里冰雪皆化

天啟三年大雪深三尺許

松潘縣志

卷八

祥異

一

崇禎二年冬十二月甲寅地震聲如雷一日一十二次小河營同日亦震山崩城塌一百二十丈壓死軍民數人次日乙卯地復震三十餘次小河亦然城垣又塌三十餘丈

十七年甲申日中有赤氣數道下濶上銳自東指西是年秋七月張獻忠入川

清順治六年秋七月初七日一月一星以次順行至晚乃沒康熙五十五年秋八月地震

雍正元年大有年

嘉慶十一年冬縣屬南坪犀牛出自黑河遊白河兩岸次年大稔咸豐庚申夏六月彗星見於井是年夷叛

光緒五年夏五月地震有聲瓦屋皆落
是年冬縣屬南坪犀牛出遊亦如嘉慶十一年狀歲大稔
十一年秋大熟未穫爲螾所害
十二年夏四月彩雲見秋七月麥出兩穗總兵夏毓秀建彩雲瑞
麥二亭於城南以紀瑞
十三年春二月地震三月地再震夏四月鄉農畜牛產犢雙舌雙
鼻四目四耳六月旱蟲食青稞冬十月地震二次
十四年夏六月地震二次
二十三年夏五月初五日暴雨平地水深數尺黑雲迷漫山谷隱
約有紅燈雙豎識者以爲蛟蟒云

松潘縣志

卷八

祥異

二

二十六年鎮署突來一獸羊首牛蹄驢尾馬鬣雙角敖岸羣集驚
視不識何名鎮軍以爲異鑄銅牌繫角上釋之
二十七年冬十二月十七日縣城內火災由北城門至古松橋止
三十年夏六月麥一莖兩穗間有一莖三穗
宣統二年春三月慧星見於井次年番變陷城
民國二年癸丑夏六月大雪損麥
六年丁巳夏四月大雪雹自申至酉積深盈寸
民國十一年七月初六日夜半縣城內火災上自陝西館下至清
真寺八月漳臘火災糧架被焚松城鄉每年秋收後將糧架近傍
房屋豎立麥草則貯藏樓上因其取用便宜故亦習慣成風城中

兩次火災俱由草樓發起延燒甚廣損失亦鉅元氣大虧此後民間糧架草樓當距離住宅五丈以外卽有火警易於救滅地方有司亦應禁止防患未然設消防局購置器俱多掘水井以期有備無患前車可鑒官民胥留意焉

松潘附近地產每年僅收一季立秋前後十餘日禾稼將熟未熟之時白晝則慮大雨寒凝冰雹夜晚則慮天晴露積爲霜禾苗受冰雹則籽散滿地而包壳亦空經霜雪則籽盡枯槁而生機立絕此二者實農民之大害也故習慣上制止之法有四
一曰請番僧唸經 二曰禁止挖藥馱藥 三曰安設大礮於山頂衝散黑雲雹雨立止 四曰收積各種骨頭柴草柏枝多

處燃燒烟合成雲寒退霜止 以上四法請番僧唸經作法以止冰雹霜雪雖事屬荒渺然虔心求神禳解災厄亦古人祈禱之遺意至於禁止挖藥馱藥說者謂驚動山神冰雹霜雪立至不知此數月內貧民不能上山生活窘矣奸民藉查山劫奪藥夫流弊生矣此等係毫無理由之迷信不足爲法惟安設大礮衝散黑雲雨止雹消與夫烟火成雲寒退霜止二法實爲可行究其事實因冰雹霜雪乃寒氣積成白晝無陽光則陰雲合而寒氣重冰雹立至有大礮以震動之則陽升陰降雲散雨止冰雹隨之而消夜晚天晴空氣愈高則寒氣愈重露積爲霜火焰布合溫氣隨之露珠仍舊不至變爲霜雪矣能於後二法籌一

的欸年中多備火藥多購柴草或於清理道路之便拾各種骨頭柴草擇曠地磊積派人專任其事并於南北城堡上至柏木橋下至北定關立一聯合會所捐會底若干舉會長一人會員每處二人自四月初一起至七月三十日止就廟宇設壇唸經共同經理白晝山頂之大礮夜晚曠地之火烟事前預備臨時勿稍疏懈則止雹止霜確有把握此實際上之制止陰陽消長寒熱降升前人試驗成效可必辦理認真可保年年豐稔國以民爲本民以食爲天所望官紳提倡農民盡力荒年永杜樂歲長歌功德無量矣

松潘縣志卷八

外紀

清康熙二十五年夏四月十六日有虎喀索統那細者音譯西域人也由甘肅河州遊歷至松居邑東山麓榆樹下土人以爲有道術師事之未幾辭欲去眾叩所往云與川北鎮馬子雲有約遂之保寧子雲延入署留數載頗有神異至康熙二十八年春三月忽然坐逝葬閭中蟠龍山松人不知也羽化之日松門人忽見師至豎留數日又辭去不言所往逾日子雲函至松言羽化日期始知丹成解脫矣松人感其異就初來時榆樹下建拱北亭名曰光照水旱偏災輒禱之守土者亦多有額贊云

松潘縣志

卷八

外紀

一

康熙間有馬光祖老人者亦西域人也東遊徧吳魯燕秦晉隴由隴入蜀居松城之山麓不食烟火惟啖棗栗人求見者輒教以敬事上帝或言及性理乾隆元年冬十一月二十五日忽尸解壽一百二歲遺命葬於廬側葬之日各省弟子不期而來會者數十人亦異事也松人爲建隱仙亭以祀之嘉慶初白蓮教匪入松境欲攻城見老人身著綠袍高與山齊率白甲將士彌滿山谷遂駭遁縣急乃解廳同知洪範以老人顯靈退敵親書保我黎民字額諸亭龐國楨湖廣人清初居松之雄雞屯性好道不慕名利崙以濟人利物爲事後棄家入雲屯堡九龍山木石同居安之若素作詩云獨上高峰望八郎黑雲散盡月輪孤茫茫宇宙人無數誰破迷關

出幻途羽化後堡人立廟祀之

乾隆間邑人有程世昌者偕妻高氏隱黃龍寺歿葬寺側後住持常見程夫婦乘白鹿來遊心疑羽化已久何以尙在人世近塚視之寂無一物儻亦如蕭史夫婦耶

嘉慶初張阿洪講道松邑適沿邊數百里皆旱軍民交病阿洪設壇縣東馬龍溝內四隅豎白旗誅書回經持箭作法頃刻黑雲密布滂沱立至平地水深一尺官民感之後阿洪至彭亦祈雨有驗猶留桃箭金甌等蹟於清真寺云

庚申未變前數月邑人曹某朝夕狂呼兵至眾以爲魔後夷叛圍城果如所言

松潘縣志

卷八

外紀

二

又未變前有僧人擊石而歌曰化箇布遮身體云云及城陷男女逃奔由通遠橋過盡被夷人剝去衣服殆應歌矣

咸豐時黃龍寺道士范教明劍州人有道術庚申之變教明遇夷於途槍矛環刺屹然不動夷驚而退

光緒時黃龍寺道士田本元遂寧人每寢息神遊四方能道數千里外事門人驚疑袖出異域物以示之

縣治西岷嶺外四十里二道海陰霾最盛內一蝦蟆大如箕每夏日驕陽輒仰浮水面口吐白光羣小蟆各銜水一點集腹上須臾白光化爲雲水點化爲雹灑瀝徧山擊傷稞麥邑中每年四月朔日卽上西岷頂安礮守土官親臨祭祀延番僧誦皇經如見雲起

卽作佛法雲輒飛散否則礮向雲頭衝擊乃止歷代相沿已久儻有韓文公其人效祭鱷故事庶幾電息而年豐乎

按段玉裁修富順縣志載前縣令熊向葵創修舊志原序曰事有爲分所應爲復爲時不可不爲乃又爲勢所難爲因勉強以爲之者此中曲折以赴勞瘁以成縱有幾微之憾應亦諒良工之用心彌苦矣此修志之難爲躬親其事者能言之松潘僻處西陲其人材款項時勢遠不逮富順而又苦無舊本依據洵難之又難也茲幸年採月訪集眾人之心思材力以成一邑之傳書本年春同人刊印未決恐尤有疎漏也者質諸前輩先生乃曰松志已數易稿徐經澄陳辛眉兩先生草創於前羅伯濟葉

惠三兩先生刪潤於後綜計二十餘萬言邊地有此文獻足徵見今時局板蕩倘再延緩原稿散失同人心血虛耗猶其小焉者也後之來者補救無繇傳述無據咎不可勝言矣卽此時而付之梓人間有不純不備之處世之覽者當亦曲諒纂修之苦衷耳夏六月乃決議刊印是役也起前清同光至民國六年草稿成中間刪削訂正又六七年十二年書始成後賢繼起再能闕者補之訛者正之新者續之則又同人所厚望也夫